



## 四時

一臺割禾機，對田頭堵到田尾，翻轉頭又堵倒轉來，行過所在斯淨淨俐俐，禾稈都無伸咧，剃過三分頭个田坵，伸著短屈短屈个禾頭。在日頭下深深恁想，該淦黃淦黃个上半截走去哪咧呢？少撇重量个田坵，這下試著已鬆爽，慢慢放氣、放氣。電線頂高个瓦雀飛落來尋食，嘰嘰喳喳發出抗議个聲說，做麼厥等个灶下，正半晝邊等斯分賊牯搬空咧呢！老狗帶緊佢一屋大細，走來搞寮晒日頭，天頂有分人燒暖个日頭，有歸暗晡守核世間人个月光，一東一西遠遠對相。

過兩日斯係冬節咧，照理講這下應該冷颼颼正著，毋過天時無正常，來這步道行路、騎鐵馬个人，還係短袖薄衫。路脣个樹花，在日頭燒燒暖暖个看顧下，也相賽現出厥笑面，一樹榮榮。昨暗晡露水重，草面頂這下還尋得著厥等个蹤跡哦！田脣田角，有該煞猛个耕種人妝點一大片恬靜个田坵，手項个鑊頭一起一落，掘泥、上土、打菜廂，在烏烏个泥肉項掖菜仁、點菜秧。有日頭、有泥肉、有露水，恁人个食糧斯無斷，這係上天个恩賜，厥个愛惜時時展現在恁人身邊，甚至圓身項。用心去感受，項項事物都奇妙，比論講這下田坵、菜園肚个菜頭，寒天時節正輪著佢大出，佢係寒性个食物，做麼毋在熱熱个天時大出，偏偏在這寒囉囉个天時分恁人嚐？這關係著人同天个四時運行，同地土个生養有關。農民曆項講「冬藏」，到寒天時萬物愛收藏保存厥等內肚个能量，恬恬等該燒暖个春風來點醒，菜頭个寒性有保存恁人陽氣个任務，共樣个係，熱天大出薑嫲這熱性个食物，因為這時節膚身同天時共樣燒嬾嬾，陽氣趁膚身出，食薑嫲使得增加腹內个陽氣，莫畀一時散盡，損著身體。老祖公流傳落來个養生方法，斯係順核這天地四時甚至日頭个起落來做根據。

「野芳發而幽香，佳木秀而繁陰，風霜高潔，水落而石出者山間之四時也」這係宋朝歐陽修在厥《醉翁亭記》中描寫个四時，佢講个係山項个四時，也斯係恁等一年過一年感受著个四時，春發、夏養、秋殺、冬藏，用在人个成長、萬物个生滅，共樣恁適當。一窟水、一盤沙，恁單淨係裡肚个一粒沙、毋堵好激起來个一滴水，盡尾還係愛轉到恬靜个宇宙，上天毋識講過一句話，毋過恁人自自然然斯對厥該項接收著無限个愛意，逐儕人一般多，體會、知得這種道理，還怨怪麼个？

看哪！馬鈴薯新暴个芽，分烏烏个泥肉銜緊，在日頭光下像正出世个嬰兒，種麼个斯收成麼个，恁人个希望、夢想，天地知得……。

作者：劉玉蕉

### ☆詞彙學習☆

- |                                  |                              |
|----------------------------------|------------------------------|
| 【堵】du+：緩慢行進。                     | 【點菜秧】diam` coi` rhong+：種下菜苗。 |
| 【翻轉頭】fan+ zhon` teu`：回過頭。        | 【大出】tai` chud`：盛產。           |
| 【對相】dui` siong`：對望。              | 【菜頭】coi` teu`：蘿蔔。            |
| 【妝點】zong+ diam`：裝飾點綴。            | 【寒囉囉】hon` lo+ lo`：冷颼颼。       |
| 【一起一落】rhid` ki` rhid` log`：一上一下。 | 【激起來】gieb` ki` loi`：激盪濺起。    |
| 【上土】shong` tu`：培土。               | 【該項】gai` hong+：那裡。           |